

قصة حياة الشهيد لوقا نجاتي
(سيناريو درامي إذاعي)



للكاتب

أ/ مايكل يوسف سلوانس

بيانات الكتاب

اسم الكتاب:

قصة حياة الشهيد لوقا نجاتي: أحد شهداء مصر بليبيا

وصف الكتاب:

الكتاب عبارة عن سيناريو درامي إذاعي يروي حياة الشهيد لوقا نجاتي. جميع الصور منشئة باستخدام أدوات الذكاء الاصطناعي، وبالتالي هي صور غير حقيقية، تم استخدامها فقط كوسيلة تعليمية، باستثناء صورة الغلاف فقط هي الوحيدة الحقيقية.

اسم الكاتب:

أ/ مايكل يوسف سلوانس

سنة النشر:

٢٠٢٦م

* ملخص العمل:

الكتاب عبارة عن سيناريو درامي إذاعي يروي قصة حياة الشهيد لوقا نجاتي أحد شهداء مصر بليليا.

يبدأ العمل بمشهد غامض يمزج بين الحلم والرؤيا، حين يستيقظ رجل على حضور شاب مضيء يقوده إلى كنيسة مغلقة، تفتح أبوابها بنظرة، وتشتعل أنوارها فجأة وسط ظلام كثيف. هناك، أمام رفات الشهيد العظيم مارمينا العجايبى، يسمع الرجل كلمات تعزية ويكتشف أن زائر له ليس إنساناً عادياً، بل أحد شهداء ليليا. يختفي الشاب، ليبدأ السؤال: من هو؟ ولماذا جاء؟

تتضح الإجابة حين تتعرف الزوجة على صورته: إنه الشهيد لوقا نجاتي، أحد شهداء مصر في ليليا عام ٢٠١٥. ومن هنا يعود السرد إلى الجذور... إلى قرية منشأة بسمالوط في المنيا، حيث بدأت الحكاية بولادة جاءت بعد صراع، ونذر قدم لله بأن يُسمى الطفل "لوقا" على اسم لوقا البشير. ومنذ طفولته ارتبط اسمه بالإنجيل، وكان الدعوة سبقت الميلاد.

ينشأ لوقا شماساً محباً للخدمة، يحمل في قلبه شوقاً صريحاً للاستشهاد "مثل قديسي زمان". لا يكتفي بمفهوم الاستشهاد الرمزي، بل يعلن رغبته في البذل الكامل. يخدم، يعمل، يترقى في الجيش بسمعة طيبة، ثم يختار أن يلغي حفل زفافه ويوجه تكلفته لخدمة كنسية متعثرة، في مشهد يكشف عمق إيمانه وتقديمه لله على ذاته.

يتزوج، تُرزق له طفلة يسميها "مريم"، ويضطر للسفر إلى ليليا بحثاً عن الرزق. ومع تصاعد الاضطرابات والتحذيرات من استهداف المسيحيين، يرفض الهروب قائلاً: "الحياة هي المسيح والموت هو ربحي". ثم تأتي ليلة الخطف... ويُعرض لاحقاً الفيديو الصادم الذي يستشهد فيه لوقا بالذبح مع ٢٠ آخرين على اسم ربنا، فيتبدل الحزن فخراً، والدموع يقيناً.

لكن العمل لا يقف عند حدود المأساة، بل يتجاوزها إلى اختبارات إيمان حي. حادث سقوط طفل من عائلته ينجو بطريقة إعجازية بعد تدخل شاب مجهول يرشد الإسعاف... ويتبين أنه الشهيد ذاته. تعود الأجساد إلى مصر عام ٢٠١٨، ويُشاد لهم صرخٌ يخلد ذكراهم، وتروى شهادات عن زيت يفيض من جسده، وشفاءات تحدث بصلوات على اسمه، وحتى ابنته ترى أباه واقفاً معها في غرفة العمليات مطمئناً: "متخافيش يا مريم".

العمل ليس مجرد توثيق لسيرة شهيد، بل رحلة روحية عن معنى الإيمان حين يُختبر بالدم، وعن عائلة قدّمت ابنها فحصدت رجاء لا ينطفئ. إنه نص درامي يجمع بين الواقعية والتجلي، بين الألم والمجد، ليؤكد أن الاستشهاد ليس نهاية، بل بداية حضور أقوى... وأن من ماتوا على اسم ربنا، صاروا شهوداً أحياء في قلوب من آمنوا.

مشهد لوقا مع الرجل:

لوقا: اصحي

الرجل: اسم الصليب انت مين ودخلت هنا ازاي فى قوضتي ؟

لوقا: متخافش وتعال معايا



خدنى الرجل الغريب ده ورحت معاه لكنيسة كانت مقفولة، فلما وصلنا عند بابها، بص بعنيه ناحية الباب فتفتح لوحده ودخلنا، بس الكنيسة كانت ظلمة فسألته ، هيه الكنيسة ظلمة كده ليه؟ فمردش على لكنه بص ناحية النجف والكشافات لاقتها كلها نورت فجأة وكان النور مبهر جدا، وبعدين قالى :

لوقا: تعال ورايا للهيكل. هذا هو مذبح الرب

الرجل: واحدة سألت من الرب واياها التمس ان اسكن في دياره إلى الأبد

لوقا: آمين. خد بركة جسد الشهيد

الرجل: بصيت على المذبح لاقيت رفات الشهيد العظيم مارمينا العجايبى، قتلوا اسمحلى اقف اصلى شوية.

لوقا: صلى براحتك انا مستنيك لما تخلص، على اقل من مهلك.

الرجل: قعدت اصرلى كئير ولما انتهيت من الصلاة قالى :

لوقا: صلواتك رفعت للسماء، الرب قادر يستجيب لها.

الرجل: آمين. لكن قولى انت مين ؟

لوقا: انا واحد من شهداء لييبيا.

الرجل: وفجأة لاقيت وشه نور جامد جدا، والتونيه البيضاء اللي كان لابسها نورت اكثر، وبعدين اختفى ، ولاقيت نفسي رجعت لقوضتي مرة تاني.

كنت محتار جدا مين الشاب ده اللي جه وزارني ، كلمت زوجتى قالتلى

مشهد الرجل مع زوجته:

الزوجة: انت تقدر توصفه ؟

الرجل: ايوا طبعا هو شاب متوسط الطول، وعمره يجي كده فى العشرينات، كان لابس تونيه بيضه عليها صليب كبير زي بتاعت الشمامسة. وكان بيتكلم صعيدي.

الزوجة: طيب بص كده هل ده اللي أنت تقصده ؟

الرجل: لاء


الزوجة: طيب شوف كده ده .

الرجل: اه هو ده، ده هو اللي جالى وانا كنت نايم.

الزوجة: ده اسمه الشهيد لوقا نجاتى من شهداء مصر بلييبيا

الرجل باستغراب: الشهيد لوقا، وياتري ايه قصته ده ، انا اول مرة اسمع عنه.

الزوجة: بص يا سيدي، بتبدأ القصة هناك من قرية منشاه مركز سمالوط بمحافظة المنيا، لما عرفت تريزا أم الشهيد لوقا انها حامل بلغت جوزها نجاتي بالخبر.



مشهد أم لوقا (تريزا مع نجاتي) الأب:

تريزا: انا حامل يا نجاتي

نجاتي بانفعال: بتقولي ايه، ازاي ده حصل، انا مش قولتلك مش عاوز عيال تاني، وكفاية اللي عندنا الولد ده لازم ينزل.

تريزا: بتقول ايه بس يا نجاتي عاوزني اموت ابني بايدي

نجاتي: انا اللي عندي قولتوا وخلص، ومفيش كلام تاني

تريزا: علشان خاطر ربنا تسبهولي واوعدك مش هجيب عيال تاني

نجاتي: انا سيبهالك وماشي واعمل حسابك يا تريزا لأننا للولد ده

تريزا: يا نجاتي يا نجاتي استني بس يا نجاتي.



الراوي: وخرج نجاتي وهو مخنوق جدا من الخبر ده، واليوم ده كان يوم حد ففكر يروح الكنيسة، فلما دخل لقي انجيل القداش بيتقري من معلمنا لوقا، وبعد القداش حس بتعزية كبيرة جدا، فرفع عينه لربنا وقال:

نجاتي: لتكن مشيئتك يارب، واللي في الخير قدمه .

وفي يوم الولادة تريزا أمه كانت متعثرة جدا، فقررنجاتي الزوج انه يروح الكنيسة ويصلي، واليوم ده كان يوم حد برضه ، فلما دخل الكنيسة سمع انجيل القداش كان من معلمنا لوقا الاصحاح ٧، فاستغرب جدا الأب نجاتي من الصدفة دي، وساعتها ندر ندر لربنا وقال:

نجأتى: يارب لو تريزا مرتي قامت بالسلامة وجابت واد انا هسميه لوقا على اسم معلمنا لوقا البشير الانجيلي.

والعجيب انه بعد القداس لما روح البيت لقي مراته تريزا ولدت وجابت ولد، فقال خلاص هسميه لوقا، وبعدها بحوالى اسبوع راح علشان يسجله فى مكتب الصحة وقال بالمرّة ياخذ بركة الكنيسة فسمع برضه انجيل القداس كان من معلمنا لوقا، ساعتها قال:

نجأتى: الظاهر كده ان دي علامة من ربنا، أنا كل لما اروح الكنيسة اسمع انجيل معلمنا لوقا، أكيد ربنا عاوزني اسمى المولود ده لوقا.



واتولد الشهيد لوقا نجأتى في ٨ / ١١ / ١٩٨٧م في قرية منشاه مركز سمالوط محافظة المنيا، ولما وصل عمره ١٠ سنين تمت رسامته شماس فى كنيسة العدرا بقريته.

وكبر لوقا بعد ما رضع لبن الايمان، وفي يوم حضر لوقا اجتماع الشباب، اللي كان فيه الخادم بيتكلم عن الاستشهاد.

مشهد لوقا مع خادم اجتماع الشباب:

الخادم: الاستشهاد ليه صور تانية كتير يا احبائي، لأن دلوقتي الزمن اتغير، ومبقاش فيه استشهاد زي زمان.

لوقا: سامحنى أنا بختلف معاك؟ انا مش شايف أن فيه استشهاد دلوقتي خالص ؟

الخادم: الاستشهاد موجود يا لوقا، فيه استشهاد بالعمل، استشهاد بالخدمة، استشهاد بصليب المرض، استشهاد بالكراسة والتبشير على اسم ربنا يسوع المسيح، دي كلها صور وأنواع من الاستشهاد.

لوقا: لاء، انا قصدي استشهد بالسيف زي قديسين زمان، زي مارمينا كده يعني، وراسي تنقطع زيه، ده الاستشهاد اللي انا عايزه. غير ده سامحنى مينفعش اسميه استشهد.

الخادم: ايوا يا لوقا بس احنا موصلناش للدرجة دي اللي فيها نرجع عصر دقلديانوس من جديد

لوقا: بس انا بقي مستني الاستشهاد يجي ويرجع زي زمان.

الخادم: ربنا موجود يا لوقا.



وحصل لوقا على مؤهل متوسط بالتحديد دبلوم فني صناعي، وبعدين دخل الجيش.

مشهد القائد مع لوقا:

القائد: الله ينور عليك يا عسكري لوقا، ولا تحب اقولك يا معلم احسن

لوقا: اللي تشوفه يا فندم

القائد: من يوم ما جيت الكتبية دي والكتبية نورت، وبقي حرفياً شكلها جميل، انت مش مجرد نقاش عادي، لاء انت فنان بمعنى الكلمة.

لوقا: الله يخليك يا فندم ده بس من ذوق حضرتك وتشجيعك لي.

القائد: انا مش عارف اكافئك ازاي، انا أصدرت قرار بترقيتك لرتبة عريف

لوقا: متشكر جدا يا فندم على اهتمامك وتقديرك لي.

القائد: انا معملتش معاك حاجة يا لوقا غير الواجب ، لانك تستاهل اكثر من كده
لوقا: دامت محبتك يا سيادة القائد ربنا يدملك الصحة والعمر ويبارك في أولادك
القائد: تعيش يا سيادة الأمباشي.



واتخرج لوقا بعدها من الجيش برتبة (عريف) بتقدير قدوة حسنة ، وده بشهادة كل اللي كانوا
بيتعاملوا معاه.

وبعد الجيش ملقاش لوقا شغل في قريته، فقرر يسافر على الأردن اللي قعد فيها حوالى سنة
علشان يكون نفسه، ولما رجع قرر انه يتجوز وقبل فرحه بـ ٣ ايام حصل.

مشهد لوقا مع الخادم وهاني صديقه:

رنة تليفون نوكيا مسجلة

لوقا: معلش يا هاني أرد على التليفون. وأرجعلك

هاني: اه طبعاً اتفضل اتفضل رد براحتك يا صاحبي.

لوقا: ألو

الخدام: ألو، ازيك يا لوقا

لوقا: الحمد الله بخير.

الخدام بتأثر: للاسف يا لوقا الكنيسة هتلقى خدمة اخوه الرب

لوقا بزعل: ليه بس كده ؟

الخدام: اصل مافيش فلوس ليها. معندناش ميزانية نصرف منها.

لوقا: طيب اقفل معايا دلوقتي وانا هتصرف.

يا هاني يا هاني.

هاني: ايوا يا لوقا

لوقا: الغى الكوشة والفرح.

هاني باستغراب: خير هو فيه حاجة حصلت يا صاحبي ؟

لوقا: لاء محصلش حاجة.

هاني: غريبة امال علوز تلغى فرحك ليه بس، دي ليلة العمر ،يعني مش بتتكرر غير مرة واحدة بس يا لوقا.

لوقا: بص يا هاني ، ربنا احسن من الكلام ده .

هاني باستغراب: أنا مش فاهم حاجة !

لوقا: انا محتاج الفلوس بتاعت الفرح دي علشان اوديها لكنيسة العدرا، الكنيسة محتاجة ، خدمة اخوه الرب هتلقى السنادي علشان معهومش فلوس ليهم.

هاني بتردد: أنا حقيقي مش عارف اقولك ايه يا لوقا يا خويا

لوقا: متقولش حاجة خالص، اسمع الكلام وروح الحق الغيهم علشان نودي فلوسهم الكنيسة

هاني: حاضر يا لوقا، ربنا يعوضك خير ويبارك حياتك .



وتجوز في ١٦ / ٧ / ٢٠١٣ من بنت اسمها تقيّة، قعد معاها اربع شهور وبعدين قرر انه يسافر للعمل بس المرادي لليبيا، لان الأوضاع فيها كانت احسن شوية من الأردن والأمور كانت مستقر بشكل كبير.

مشهد الزوجة تقيّه مع لوقا:

الزوجة: كده يا لوقا تسبني وانا حامل في ٣ شهور وتسافر، مش تستني لما اولد طيب

لوقا: معلى لازم اسافر علشان خاطر العيل اللي جاي ده نلاقيلا مصاريف.

الزوجة: بس انا ملحققتش اشبع منك يا لوقا.

لوقا: معلى غصب عني معنديش حل ثاني غير السفر، انتي شايفه البلد بتاعتنا مفهانش شغل خالص.

الزوجة: ابقى طمني عليك يا لوقا

لوقا: هكلمك وطمنك على، متقلقش

الزوجة: خلى بالك من نفسك يا حبيبي.

لوقا: متخافيش على يا تقيّه ربنا معايا وقادر يحفظني في الغربة دي.



الراوي: ومرت الايام وشهور الحمل خلصت وتقية مراته ولدت وجابت بنت، فاتصلت امه تريزا علشان تفرحه بالخبر ده.

+ مشهد لوقا مع امه :

الأم: الو

لوقا: الو ازيك يا أمي

الأم: نشكر ربنا بخير يا بني

لوقا: وابويا واخواتي عاملين ايه؟

الأم: كويسين ببسلموا عليك، عندي ليك خبر حلو

لوقا: خير يا أمي

الأم: تقية مرتك ولدت.

لوقا بفرح: مراتي ولدت، طب وجابت ايه؟

الام: جابت بنت زي العسل، هتسميها ايه؟

لوقا: ودي عايزه كلام، طبعا هنسميها مريم على اسم الست العدرا ، دي حتى كنيستها عندنا.

الأم: بركتك يا أم النور يا طاهرة، طيب وانت على كده ناوي تيجي ميتا عشان انا متوحشاك، وعشان تشوف مراتك وبنتك.

لوقا: ربنا وحده اللي يعلم يا ماي انى انا كمان متوحاشكم قوي، بس للاسف اني مش هعرف اجي اليومين دول، كان نفسي اجيالك واجيبلك هدية فى عيد الأم يا غالية، بس اقولك على حاجة يا امي

الأم: قول يا لوقا يا حبيبي

لوقا: انا فعلا مش عارف اجيبلك هدية لانى بعيد عنك، لكن انا هديلك اغلى حاجة عندي، خدي مريم بنتى يا امي دي تبقي هديتك.

الأم: ربنا يخلهالك وتتربي في عزك يا بني.



الراوي:

ومرت شهور، وبدأت الأوضاع تسوء في ليبيا ومعدتش الأمور مستقرة زي الأول وفي يوم جه تليفون للشهيد لوقا.

+ مشهد جرجس مكرم تليفون للوقا:

جرجس: الو، ازيك يا لوقا عامل ايه؟

لوقا : نشكر ربنا بخير يا جرجس

جرجس: بقولك يا لوقا انا عاوزك تجمع اخواتك المسيحين اللي معاك في ليبيا وترجع بيهم لمصر على طول في اقرب وقت ممكن.

لوقا: ايه الطلب الغريب ده، ليه عاوزنا نرجع يعني.

جرجس: اصل فيه واحد ليبي معرفة وتبعي، قالى ان المسيحين مستهدفين من الارهاب هناك في ليبيا، وانهم حاطيين مكافئات مالية كبيرة لاي حد يقول على أماكنهم.

لوقا: واحنا من متى بنخاف من الموت يا جرجس، يا اخي ياريت كلنا نموت على اسم المسيح

جرجس: بلاش تهور واسمع الكلام يا لوقا.

لوقا:إن الحياة هي المسيح والموت هو ربحي.

الراوي: ومرت شهور قليلة وقربنا من رأس السنة الميلادية، ففكر لوقا ينزل البلد يسلم على اهله، فاتصل بيهم يوم ٢٩ / ١٢ / ٢٠١٤م علشان يفرحهم ويعرفهم انه جاي.

+ مشهد ليلة الخطف تليفون لوقا مع امه:

لوقا: الو

الأم: ألو يا لوقا يا ولدي، كيفك وكيف حالك ؟

لوقا: الحمد الله بخير يا مايا .

الأم: ربنا دايمًا يجعلك تكون في أحسن حال يا بني

لوقا: تعيشي يا حبيبتي، بقولك يا اما ، انا جهزت حالي وجاي اعيد معاكم رأس السنة وعيد الميلاد.

الأم: بجد يا لوقا هتيجي تعيد في وسطينا يا حبيبي.

لوقا: ايوا بجد يا اما انا خلاص اتفقت مع السواق وهركب النهاردة الساعة واحدة بليل، وجاي معايا عصام ولد عمي وخمسة تانيين من البلد.

الام: طيب يا حبيبي خلى بالك من نفسك، وياريت متجيش حاجة معاك ، تعال خفيف احسن علشان تقدر تتحرك بسرعة.

لوقا: متخافيش على يا امي ، ربنا موجود.

+ مشهد الاب مع الام الشهيد لوقا:

الاب بحزن : احنا بقالنا دلوقتي حوالى ٤٨ يوم ومنعرفش حاجة عن لوقا ولا عن الناس اللي كانوا راكبين معاه.

الزوجة: وايه العمل يا نجاتي ؟

الاب: العمل عمل ربنا يا تريزا ، قومي بينا نصلى

الام: يارب انت اللي قولت كل ما تطلبونه في الصلاة مؤمنين باسمي تنالونه، انا بطلب منك يارب ان لوقا ابني يرجع تاني، يارب احمي ابني لوقا ومتسمحش انه يحصل له اذي.

الاب: كفاية كده بقي يارب احنا تعبنا قوي، انت شوفت تعبنا قد ايه ، فلو انت يارب اخترتهم علشان يجولك، يبقى يكونوا ماتوا شهداء على اسمك.

الام: اتصرف يارب بمعرفتك واختار للوقا واللي معاه الصالح. آمين.



شنودة : يا با يا با ، الحق بابا

الاب: خير يا شنودة يا ولدي بتجري كده ليه ؟

شنودة: لوقا اخويا استشهد على اسم المسيح.

الاب: لوقا ابني استشهد ؟ لوقا ابني بقي شهيد ؟

شنودة: ايوا يا بابا

الأب باستغراب: طيب وانت عرفت منين ؟

شنودة: الارهاب عرضوا فيديو على الننت، وشوفت اخويا لوقا فى الفيديو وهو بيدبح، تعرف
اخر عبارة قالها كانت ايه؟

الاب: ايه ؟

شنودة: اخر حاجة قالها: ياربى يسوع المسيح.

الاب بفرح: اشكرك يارب انك استجبت لصلواتنا، وان لوقا ابني استشهد على اسمك.

الراوي:

واستشهد لوقا نجاتى في سنة ٢٠١٥م ،وهو عنده حوالى ٢٨ سنة، استشهد بالدبح مع ٢٠ شهيد
تانيين ، وفى يوم الدبح ده بدأ الارهاب يسمعون أصوات بتقول كرياليسون بس المرة دي كانت
بصوت قوي جدا، لكنه مكنش طالع من الشهداء الصوت كان جاي من حواليتهم، وظهرت
ارواح لابييسن ابيض، وشهداء تانية كتير زي ابو سيفين اللي كان ماسك سيفين، ومارمينا
ومارجرس اللي كان راكب على حصانه، ده غير السيد المسيح اللي شافوه مستنيين في السما.


ولما وصل خبر استشهاده لمصر أهل قريته زعلوا جدا، وبدنوا يجوا بيت ابوه علشان يعزوه،
وفى اليوم التالت كانت ناهد مرات شنودة اخو الشهيد لوقا قاعدة مع الناس بتاخذ العزا ولما
تعبت طلعت فوق علشان تريح شوية، ونسيت تاخذ ابنها كرسنوفر اللي كان وقتها عمره حوالى
سنتين ونصف، فالواد طلع يجري بسرعة علشان يلحق امه، فوقع من الدور التالت من على
السلم، لان البيت وقتها كان تحت الانشاء، مكنوش لسه عملوا سور للسلم.

مشهد ناهد مع شنودة وابو لوقا والمسعف:

ناهد: الحقوني يا ناس ابني وقع من على السلم

شنودة بخوف: اهدي يا ناهد، انا هاخده واروح بيه المستشفي

ناهد: خدني معاك....



(صوت سرينة اسعاف)

المسعف: فين الطفل اللي لسه واقع من على السلم ؟

شنودة: الطفل اهو في ايدي.

المسعف: كده طيب يلا بينا حالا

شنودة: امال انتوا عرفتوا منين ان ابني وقع ، وازاي جيتوا بسرعة قوي كده

المسعف: احنا كنا ماشين على الطريق العام، وفجأة جه واحد شاب وقفنا وقلنا نيجي هنا، قولنالوا مش عارفين الطريق قام ركب معانا وقالنا تعالوا اوصلكم.

شنودة: طيب والشاب ده فين ؟

المسعف: انا عارف انت شايف الدنيا زحمة ازاي تلاقيه تاه مننا دلوقتي

شنودة: طيب لو شوفت صورة الرجل الشاب ده تعرفه؟

الاسعاف: اه طبعاً اعرفه، ازاي يعني اتوه عنه.

شنودة: بص كده هو ده ؟

الاسعاف: اه هو .

الاب: طيب انتوا عارفين العزا ده بتاع مين؟

الاسعاف: بتاع مين يعني ؟

الاب: ده بتاع الشاب اللي قابلكم وقالكم ان فيه طفل وقع.



ولما راحوا مستشفى الراعى فى سمالوط الدكتور قالهم:

الدكتور: نتيجة الفحوصات والاشعات الطبية زي الفل، مفهانش اي حاجة خالص، انا كشفت على الطفل هو سليم بنسبة ١٠٠ في الميه ، مفهوش كسر او حتى أي خدش.

شنودة: حقيقي ليتمجد الله في قديسيه، شكرا ليك يا خويا ، شكرا ليك يا لوقا يا شهيد ربنا يسوع المسيح.

الراوي: واتبني ليهم كاتدرائية كبيرة بايبارشية سمالوط في المنيا، بقرية العور ٨ امشير موافق ١٥ فبراير ٢٠١٧. الا ان اجساد الشهداء مكنوش لسه يعرفوا عنها حاجة، فصلت ام الشهيد لوقا لربنا بحرارة وقالت:

+ مشهد صلاة للام: أماني حليم أم لوقا صعيدي

يارب يسوع المسيح اسمع صلاتي انت قولت اسالوا تعطوا اطلبوا تجدوا اقرعوا يفتح لكم، انا مش عايزه حاجة من الدنيا دي يارب غير ان لوقا ابني حبيبي يبجي جسده هو واخواته اللي معاه .

يارب يا لوقا يا حبيبي يجي جسدك انت واخواتك اللي معاك، يارب تيجي بالسلامة ويبقي جسدك زي اجساد القديسين واجي وازورك يابني.



وبالفعل استجاب ربنا لصلاة امه تريزا ورجعت اجساد الشهداء في مايو ٢٠١٨م. وتم وضعهم في كاتدرائيتهم بسمالوط بمحافظة المنيا. ولما الاجساد رجعت نزل من صورة الشهيد لوقا الموجودة على جسده زيت كثير جدا في اليوم ده، وكان الشهيد بيبارك المكان ويبفرح مع اهله برجوعه من ليبيا لمكان بلده.

ومن معجزات الشهيد لوقا كمان بعد لما جسده رجع على طول كان فيه واحدة ست اسمها ماري من قرية الشهيد، كان ابنها تعبان قوي فصلت لربنا وقالت :

ربي يسوع الغالى، ابني تعبان جدا وحرارته مش علوزه تنزل ابدا والعلاج مش بيجيب نتيجة تعال يا بني انا هاخذك واحطك على جسد الشهد لوقا علشان ربنا يتمجد معاك.

الراوي: وبالفعل اول لما الطفل لمس جسد الشهيد لوقا، خف فى ساعتها ودرجة الحرارة بقت طبيعية جدا، ومعدتش السخونية بتيجي تاني.

ومن معجزات الشهيد لوقا كمان ان بنته ماري كان فاضل لها حوالى اسبوع على امتحانات نهاية العام، وفى الفترة دي تعبت جدا ولما كشفت الدكتور قال: الزايدة على وشك الانفجار. وای تاخير هيكون فيه خطر على حياتك، لازم ندخل عمليات فى اسرع وقت ممكن، علشان متحصلش مضاعفات أحنا فى غنى عنها.

فهيه كانت خايفة تتعب بعد العملية ومتقدرش تدخل الامتحانات، فصلت البنت لربنا وقالت : يارب اقف معايا، انا صحيح مشوفتكش ياابا بالجسد لكن انا علوزاك تكون معايا جوه في العملية. وبالفعل دخلت مريم بنته العمليات وشافت الشهيد لوقا واقف جنبها وبيقولها:

لوقا: متخافيش يا مريم يا بنتي انا جانبك اهو ومش هسيبك ابداء، وقت لما تنادي على مش هتاخر عنك يا حبيبتي.

الراوي: والكنيسة بتعيد ليهم يوم ٨ أمشير الموافق ١٥ فبراير من كل عام .

بركة ربنا وشفاعة الشهيد لوقا وشهداء مصر بليبيا تكون معانا ولربنا المجد الدائم امين.